



Na osnovu člana 17. stav 2. i člana 44. stav 1. Zakona o Visokom sudskom i tužilačkom vijeću Bosne i Hercegovine („Službeni glasnik Bosne i Hercegovine“, br. 25/04, 93/05, 48/07, 15/08, 63/23, 9/24 i 50/24), a u vezi sa članom 61a. i 62. Poslovnika Visokog sudskog i tužilačkog vijeća Bosne i Hercegovine („Službeni glasnik Bosne i Hercegovine“, br. 55/13, 96/13, 46/14, 61/14, 78/14, 27/15, 46/15, 93/16, 48/17, 88/17, 41/18, 64/18, 12/21, 26/21, 35/21, 68/21, 1/22, 26/23, 83/23, 9/24, 27/24 i 72/24), Visoko sudsko i tužilačko vijeće Bosne i Hercegovine (u daljem tekstu: Vijeće), u sastavu, sutkinja Sanela Gorušanović - Butigan i sudija Velimir Ninković, potpredsjednici Vijeća, te sudija Izo Tankić, sutkinja Aleksandra Obradović, tužiteljica Bojana Jolović, tužiteljica Snježana Petković, sudija Sedin Idrizović, tužilac Saša Sarajlić, prof. dr. Džamna Vranić, advokatica mr Duška Bogojević, tužiteljica Željka Fabić i advokatica Elma Veledar Arifagić, na sjednici održanoj 07. i 08.05.2025. godine, donijelo je

RJEŠENJE

o imenovanju zamjenika glavnog tužioca Kantonalnog tužilaštva Kantona Sarajevo

- I. Za zamjenika glavnog tužioca Kantonalnog tužilaštva Kantona Sarajevo imenuje se **Pašić Maja** na mandat od pet (5) godina.
- II. Datum stupanja na dužnost imenovane Vijeće će odrediti posebnom odlukom.

Obrazloženje

Na osnovu člana 36. Zakona o Visokom sudskom i tužilačkom vijeću Bosne i Hercegovine (u daljem tekstu: Zakon o VSTV-u BiH) i člana 33. i 34. Poslovnika Visokog sudskog i tužilačkog vijeća Bosne i Hercegovine (u daljem tekstu: Poslovnik VSTV-a BiH), Vijeće je na internet stranici dana 07.11.2024. godine objavilo javni konkurs pod brojem: 04-07-3-4035-1/2024, kojim je oglašena 1 (jedna) pozicija zamjenika glavnog tužioca Kantonalnog tužilaštva Kantona Sarajevo.

U skladu sa članom 10a. Zakona VSTV-u BiH i čl. 32s. i 32u. Poslovnika VSTV-a BiH, tužilac Sanin Bogunić, predsjednik Vijeća izuzeo se iz cjelokupnog postupka predlaganja i imenovanja za poziciju zamjenika glavnog tužioca Kantonalnog tužilaštva Kantona Sarajevo.

Nakon provedene konkursne procedure, nadležno podvijeće je u skladu sa članom 59b. st. (1), (2) i (4), a u vezi sa članom 61a. Poslovnika VSTV-a BiH izvršilo finalno rangiranje kandidata, te je Vijeću dostavilo rang listu kandidata sa obrazloženim prijedlogom za postupanje.

Razmatrajući zaključenu rang listu kandidata i utvrđeni broj bodova, kao rezultat ocjenjivanja svih kriterija propisanih Zakonom o VSTV-u BiH i Poslovnikom VSTV-a BiH, Vijeće je odlučilo da za poziciju zamjenika glavnog tužioca Kantonalnog tužilaštva Kantona Sarajevo imenuje kandidatkinju na rang listi pod rednim brojem 1 Pašić Maju, iz reda ostalih, koja trenutno obavlja dužnost tužiteljice Kantonalnog tužilaštva Kantona Sarajevo.

Vijeće je nakon ocjene stručnosti kandidatkinje, sposobnosti pravne analize, komunikativnosti i sposobnosti prezentacije, sposobnosti kandidatkinje da odgovorno, nezavisno i nepristrasno obavlja funkciju tužioca, uzimajući u obzir, između ostalog, dosadašnje radno iskustvo kandidatkinje, profesionalnu nepristrasnost i ugled, ponašanje van posla, edukaciju i usavršavanje, objavljivanje stručnih i naučnih radova, te druge aktivnosti u struci, rukovodne vještine i iskustvo, sposobnost upravljanja ljudskim potencijalima i ocjene kriterija podobnosti, ocijenilo da imenovana kandidatkinja u

potpunosti ispunjava uslove za imenovanje propisane u članu 43. Zakona o Visokom sudskom i tužilačkom vijeću Bosne i Hercegovine.

Kada je u pitanju broj ostvarenih bodova, Vijeće je imalo u vidu da je imenovana kandidatkinja u toku konkursne procedure, u pogledu bodova za kriterij stručnosti i sposobnosti pravne analize ostvarila ukupno 100 bodova od mogućih 100 bodova, dok je na razgovoru pred nadležnom komisijom Vijeća u pogledu drugih kriterija ostvarila ukupno 29 od mogućih 30 bodova, što ju je u konačnici rangiralo na prvo mjesto rang liste kandidata sa ukupno ostvarenih 129 bodova od mogućih 130 bodova.

Kriteriji stručnosti i sposobnosti pravne analize imenovane kandidatkinje, koja je nosilac pravosudne funkcije, utvrđeni su na osnovu ocjene rada za posljednje tri godine za koje je ocijenjena, i to za 2021. g., 2022. g. i 2023. g., a računajući do dana isteka roka za podnošenje prijave po navedenom konkursu.

Na osnovu ocjena rada za 2021. g., 2022. g. i 2023. g., odnosno ocjena 5, 5 i 5, utvrđeno je da je imenovana kandidatkinja za navedene tri godine za koje je ocijenjena ostvarila prosjek od 5. Prema odredbama člana 56. stav 2. Poslovnika VSTV-a BiH, njenoj prosječnoj ocjeni rada za prethodne tri godine koja iznosi 5 dodijeljen je ekvivalentan broj bodova koji se koristi u konkursnoj proceduri od 100 bodova.

Ostali kriteriji, koji se odnose na sposobnost kandidatkinje da odgovorno, nezavisno i nepristrasno obavlja funkciju za koju se prijavila, profesionalne nepristranosti i ugleda, te ponašanja van posla, dosadašnjeg radnog iskustva kandidatkinje, edukacije i usavršavanja, objavljivanja stručnih i naučnih radova, te drugih aktivnosti u struci, komunikativnosti, rukovodne vještine i iskustvo, te sposobnost upravljanja ljudskim potencijalima, utvrđeni su na razgovoru pred nadležnom komisijom Vijeća, kojom prilikom je svaki član komisije nezavisno bodovao kriterije, kako je to propisano u čl. 54., 54c., 54d., 54e. i 54f. Poslovnika VSTV-a BiH, pri čemu je kandidatkinja po tom osnovu u konačnici ostvarila ukupno 29 bodova. Konačan broj bodova koje kandidat ostvari na razgovoru predstavlja prosjek zbira ocjena po kriterijima koji se ocjenjuju na razgovoru.

Pored ukupnog broja ostvarenih bodova, na osnovu kojih je kandidatkinja u skladu sa čl. 59a. stav (2) tačka a) Poslovnika VSTV-a BiH stekla uvjete za predlaganje i imenovanje na poziciju zamjenika glavnog tužioca kantonalnog tužilaštva, Vijeće je vodilo računa o okolnostima koje su relevantne za procjenu podobnosti iz člana 48a. Poslovnika VSTV-a BiH, ocijenivši da ne postoje okolnosti koje izazivaju sumnju u pogledu podobnosti kandidatkinje za poziciju za koju se prijavila.

Prilikom imenovanja, Vijeće je shodno dosadašnjoj praksi vodilo računa o potrebi osiguranja adekvatne zastupljenosti konstitutivnih naroda i ostalih u okviru rukovodne strukture navedenog tužilaštva. Pored navedenog, uzeta je u obzir i činjenica da je narednim konkursom planirano oglašavanje dvije (2) pozicije zamjenika glavnog tužioca Kantonalnog tužilaštva Kantona Sarajevo, obzirom da jednom od aktuelnih zamjenika glavnog tužioca u narednom periodu ističe mandat, dok je drugi zamjenik glavnog tužioca imenovan na drugu pravosudnu poziciju.

Vijeće je mišljenja da imenovana kandidatkinja posjeduje potrebne rukovodne vještine, stručno znanje, kao i potrebno radno iskustvo, te da ispunjava sve uslove da obavlja poziciju zamjenika glavnog tužioca Kantonalnog tužilaštva Kantona Sarajevo, a to posebno cijeneći njenu dosadašnju veoma uspješnu profesionalnu karijeru tokom koje je cijeli svoj radni vijek provela u Kantonalnom tužilaštvu Kantona Sarajevo. U periodu od 2004. g. do 2007. g., u navedenom tužilaštvu je obavljala poslove stručnog saradnika i višeg stručnog saradnika, a od 01.07.2007. godine izuzetno uspješno obavlja dužnost tužioca i trenutno je šef Odjela za opšti kriminalitet.

Imenovana kandidatkinja ima preko 20 godina radnog iskustva nakon položenog pravosudnog ispita. Na Pravnom fakultetu Univerziteta u Sarajevu, Katedra krivičnog prava, stekla je akademsku titulu i naučno zvanje magistra prava. Edukator je pri Centru za edukaciju sudija i tužilaca Federacije Bosne i Hercegovine. Razumije ulogu i namjeru institucije u ostvarivanju državnih strateških prioriteta i utjecaj

istih na vlastito područje rada, a što je kandidatkinja jasno navela kroz odgovore na postavljena pitanja i konkretne korake učinjene ka realizaciji državnih strateških prioriteta u saradnji sa agencijama za provođenje zakona. Kroz primjere je navela na koji način Odjel u kojem je šef ostvaruje institucionalne strategije i preuzima odgovornost za realizaciju. Jasno analizira prednosti i slabosti Odjela, utvrđuje područje za unapređenje. Jasno kroz odgovore pokazala na koji način je unaprijedila rad Odjela i na koji način je osigurala maksimalno djelovanje uposlenih unutar Odjela. Na razgovoru pred Komisijom za obavljanje razgovora, pokazala je veoma dobre vještine verbalne komunikacije, elokventa, otvorenog i opuštenog držanja, govori jasno i daje konkretne odgovore.

Uzimajući u obzir sve navedeno, Vijeće je ocijenilo da imenovana kandidatkinja u potpunosti ispunjava zakonom propisane uslove, kao i druge kriterije koji se cijene prilikom izbora kandidata, kako bi bila imenovana na poziciju zamjenika glavnog tužioca Kantonalnog tužilaštva Kantona Sarajevo.

Kandidatkinja se na dužnost zamjenika glavnog tužioca, u skladu sa članom 31. stav (2) Zakona o VSTV-u BiH imenuje na mandat od 5 (pet) godina.

U pogledu dijela rješenja o stupanju na dužnost imenovane, isto se odgađa do okončanja dodatne provjere iz člana 86c. Zakona o VSTV-u BiH, a u vezi sa članom 19. stav (3) Pravilnika Visokog sudskog i tužilačkog vijeća Bosne i Hercegovine u vezi s izvještavanjem o imovini i interesima („Službeni glasnik BiH“ br. 20/24 i 57/24), odnosno do okončanja upravnog spora ukoliko je pokrenut protiv rješenja o imenovanju.

Ovo rješenje će biti objavljeno na internet stranici Vijeća, shodno članu 44. stav (1) Zakona i članu 62. stav (4) Poslovnika VSTV-a BiH, uz naznaku datuma objave od kojeg počinje teći rok za podnošenje tužbe.

Imajući u vidu sve iznesene razloge, Vijeće je odlučilo kao u izreci ovog rješenja.

Pouka o pravnom lijeku: Protiv ovog rješenja može se pokrenuti upravni spor pred Sudom Bosne i Hercegovine u roku od osam dana od dana objavljivanja rješenja o imenovanju na internet stranici Vijeća.

Broj: 04-07-3-1694-1/2025
Datum: 08.05.2025. godine



Potpis predsjednika VSTV-a BiH

Sanela Gorušanović - Butigan

